
ՀԱՍԱՐԱԿԱԿԱՆ ԱՇԽԱՐՀԱԳՐՈՒԹՅՈՒՆ ԵՎ ԿԱՌԱՎԱՐՈՒՄ

ՄԱԹՈՍՅԱՆ Մ. Ռ.

Հայտնի է, որ կառավարումը կազմակերպված տարաբնույթ համակարգերի սահմանված կառուցվածքների, դրանց գործունեության ռեժիմի պահպանումը և ծրագրերի իրականացումն ապահովող նպատակաուղղված գործունեություն է¹: Կառավարման ժամանակակից հայացքների համակարգը ձևավորվել է համաշխարհային հասարակական զարգացման մեջ տեղի ունեցած օբյեկտիվ փոփոխությունների ազդեցության ներքո: Բազմաթիվ երկրների համար XX դ. առաջին կեսը հասարակական արտադրության արդյունաբերական զարգացման շրջան էր: Մի շարք առաջատար երկրներ, որ առաջին տեղերն էին զբաղեցնում աշխատանքի արտադրողականության ցուցանիշներով, XX դ. երկրորդ կեսին հաստատեցին հետարդյունաբերական զարգացման դարաշրջանին անցման սկիզբը: Փոփոխությունների գլխավոր գործոնը գիտատեխնիկական առաջընթացն էր: Հետպատերազմյան շրջանում տեղի ունեցավ համաշխարհային տնտեսության կառուցվածքի վերափոխում. տնտեսության մեջ աճեց այն ձյուղերի դերը, որոնք անմիջականորեն բավարարում էին մարդկանց պահանջումները: Արմատապես փոփոխվող տնտեսական միջավայրում կառավարմանը վերաբերող հայացքներն ու համակարգը ձևավորվեցին 1970-80-ական թվականներին: Կառավարման հարցերին նոր մոտեցումը պահանջեց կառավարման սկզբունքների վերանայում, քանզի հները նոր պայմաններում այլևս չէին գործում: 90-ական թթ. մեծ ուշադրություն էր դարձվում կառավարմանը մարդկային կամ սոցիալական տեսանկյունից: Կառավարման ժամանակակից հայացքների համակարգը գրականությունում հայտնի է որպես «խաղաղ կառավարչական հեղափոխություն»²:

Հասարակական կյանքի զարգացմանը և բարդացմանը զուգընթաց՝ բարդանում է և՛ կառավարման բովանդակությունը, փոխվում են դրա հիմնարար դրույթները, և ընդլայնվում են կիրառման բնագավառները:

Հայտնի է, որ կառավարման բնագավառների համընդհանուր ընդունելության արժանացած դասակարգում դեռևս չկա, թեև առկա են տարբեր առաջարկություններ և մոտեցումներ: Դրանց մեծ մասն ուղղակի կամ միջնորդավորված վերաբերում է աշխարհագրական գիտությունների համակարգին:

Աշխարհագրության տեսանկյունից առավել ուշագրավ է Վ. Դ. Գրաժդանի՝ կառավարման դիրքերից մշակված հետևյալ դասակարգումը³.

¹ Философский энциклопедический словарь., М., 1988, с. 674.

² Виханский О. С., Наумов А. И. Менеджмент. Учебник, М., 1998.

³ Վալեսյան Լ., Աշխարհագրական կանխատեսում, Ե., 2008, էջ 145:

1. պետական տարածքային կառավարում (աշխարհագրություն, ռեգիոնալիստիկա և ռեգիոնալություն)։

2. ոչ պետական տարածքային կառավարում (քաղաքական աշխարհագրություն, քաղաքացիական հասարակագիտություն)։

3. արտադրական գործունեության կառավարում (տնտեսագիտություն, տնտեսական աշխարհագրություն, մենեջմենթ)։

4. տեղեկատվական գործունեության կառավարում (սոցիալական տեղեկատվություն, աշխարհագրական տեղեկատվական համակարգ)։

Փորձենք առանձնացնել միայն այն ոլորտները, որոնք առնչվում են հասարակական աշխարհագրության ուսումնասիրության շրջանակներին։ Վերոնշյալ դասակարգումից ակնհայտ են կառավարման և աշխարհագրության փոխհամագործակցության հնարավորությունները։ Ստորև առավել հանգամանորեն անդրադառնանք պետական տարածքային կառավարմանը։

Աշխարհագրության առումով առավել կարևորվում են կառավարման տարածքային տեսանկյունը և դրա արդյունավետ կառավարումը, քանզի երկրի տարածքային կառուցվածքի տաքսոնոմիական համակարգում առանձնացված քաղաքական տարածքային և վարչատարածքային միավորները միաժամանակ հանդես են գալիս նաև որպես սոցիալ-տնտեսաաշխարհագրական ուսումնասիրության օբյեկտներ։

Տարածքային կառավարումը պետության կողմից իրականացվող նպատակային գործունեություն է՝ ուղղված տնտեսության տարածքային կառուցվածքի տաքսոնոմիական միավորների կառավարմանը։

Այսօր տարածքային կառավարման, ինչպես նաև հասարակական աշխարհագրության առաջնային խնդիրներից մեկը հասարակական կյանքի տարածքային արդյունավետ կազմակերպումն է։ Հասարակության մեջ յուրաքանչյուր կառավարում, առավել ևս տարածքայինը, հենվում է մի քանի ընդհանուր սկզբունքների վրա՝ կառավարման օբյեկտիվություն, ժողովրդավարություն, իրավական կարգավորելիություն, հրապարակայնություն, գիտականություն, մրցակցություն։

Այստեղից կարելի է եզրակացնել, որ վերոնշյալ խնդիրների լուծման նպատակով աշխարհագրության և տարածքային կառավարման ջանքերի համատեղումը և փոխհամագործակցությունը կտան ցանկալի արդյունքներ, եթե առկա է համապատասխանություն վերոնշյալ սկզբունքներին։

Պետության տարածքային կառուցվածքից են նաև մեծապես կախված պետական և տեղական իշխանությունների կազմակերպման հարցերը, քանի որ տարածքային կառավարման և տեղական ինքնակառավարման մարմինների գործունեությունն իրականացվում է վարչատարածքային կառուցվածքային միավորների սահմաններում⁴։ Տարածքային կառավարման կառուցվածքը պետք է համապատասխանի երկրի հասարակական-

⁴ Միրզոյան Վ., Պետական կառավարում և հանրային կառավարում (Հայաստան, 14.X.2005)։

տնտեսական կառուցվածքին: Այսինքն՝ յուրաքանչյուր վարչատարածքային միավոր պետք է ներառի տարածք, որի վրա տեղաբաշխված են իր գործունեության և գործառնությունների իրագործումն ապահովող համակարգեր⁵: Այդ համակարգերում իր ուրույն տեղն ունի ռեզիդենտ քաղաքականությունը, որի վերջնական նպատակը նույնպես երկրի զարգացման տարածքային առումով արդյունավետ կառավարումն է:

Տարածքային կառավարման և աշխարհագրության համագործակցության ուղղություններից ամենակարևորը և ամենահեռանկարայինը աշխարհագրական կանխատեսումն է, որը և գիտատեսական հիմք է տարածքային կառավարման համար: Կանխատեսումը ծառայում է կառավարմանը, և միաժամանակ կանխատեսման օբյեկտը աշխարհագրական կանխատեսման օբյեկտն է:

Աշխարհագրական կանխատեսման նպատակն աշխարհագրական միջավայրի և առանձին երկրահամակարգերի ապագա վիճակի և զարգացման հեռանկարների գիտականորեն հիմնավորված դատողությունների և հաշվարկների մշակումն է, որն անհրաժեշտ է և ծառայում է կառավարմանը: Այստեղից հետևում է, որ աշխարհագրական կանխատեսման ճշգրիտ արդյունքներից են կախված կառավարման վճիռներ կայացնելու արդարացիությունը և արդյունավետությունը: Այս իմաստով Հայաստանում տասնամյակներ շարունակ առկա են եղել տարածքային զարգացման անհամաչափ դրսևորումներ, բնեռացում, որն իր տրամաբանական շարունակությունը ստացավ անկախությունից հետո:

Խորհրդային ժամանակաշրջանում տարածքային կառավարումն իրականացվում էր կենտրոնացված պլանավորման տարածքային բաղադրիչի միջոցով: Սակայն պատմական փորձը ցույց է տվել, որ այդ կառավարումն արդյունավետ չէ, իսկ կառավարման վարչափրամայական մեթոդի պայմաններում խաթարվում է շրջանների բնականոն զարգացումը:

Նոր վարչատարածքային բաժանման պայմաններում անհամապատասխանություններ ի հայտ եկան տնտեսական շրջանների և վարչատարածքային միավորների միջև (տարբերություններ ի հայտ եկան ինչպես առանձին մարզերի, այնպես էլ համայնքների միջև): Ստեղծվեցին նաև մեծ թվով համայնքներ, որոնց հիմնական մասը ֆինանսական, աշխատանքային, հողային և այլ ռեսուրսների անբավարար լինելու պատճառով չեն կարող կազմակերպել իրենց բնականոն գործունեությունն ու զարգացումը⁶: Վարչատարածքային բաժանման նախագծման ժամանակ լիարժեք հաշվի չեն առնվել հանրապետության ռելիեֆային խիստ բարդ կառուցվածքը, կլիմայական պայմանների բազմազանությունը և որոշ

⁵ Տե՛ս Թումանյան Դ., ՀՀ վարչատարածքային բաժանման օպտիմալացումը և տեղական ինքնակառավարման զարգացումը, Ե., 2003:

⁶ Տե՛ս Ղազարյան Է., Հայաստանի Հանրապետության վարչատարածքային բաժանման կատարելագործման հայեցակարգային ուղղությունները, Ե., 2004:

համայնքների հեռավորությունը մարզկենտրոններից:

Շուկայական տնտեսության պայմաններում տարածքային կառավարման միջոց դարձավ սոցիալ-տնտեսական ռեգիոնալ ծրագրավորումը: Այս պարագայում էլ անհրաժեշտ էր պետության միջամտության և շրջանների ինքնագարգացման օրինաչափությունների համատեղում: Սակայն թերի կառավարման դեպքում առաջացան նոր խնդիրներ՝ պատճառ դառնալով ռեգիոնների միջև զանազան անհամամասնությունների: Այստեղ է, որ օգնության է հասնում ռեգիոնալ քաղաքականությունը իր համապատասխան մեթոդների՝ ռեգիոնալ պլանավորման, ծրագրավորման և կանխատեսման միջոցով՝ նպաստելով անհամաչափությունների նվազեցմանը:

Վերոնշյալից հետևում է, որ կառավարման՝ հատկապես տարածքային կառավարման արդյունավետությունը կախված է աշխարհագրական կանխատեսումից և ռեգիոնալ քաղաքականության փոխադարձ համագործակցությունից:

ОБЩЕСТВЕННАЯ ГЕОГРАФИЯ И УПРАВЛЕНИЕ

МАТОСЯН М. Р.

Резюме

В условиях рыночной экономики социально-экономическое региональное программирование стало средством территориального управления. В этой связи возникла необходимость совмещать закономерности регионального саморазвития и государственное посредничество. Однако при недостаточно успешном управлении это приводит к тем или иным региональным диспропорциям. И в этом случае необходимо задействовать региональную политику, предполагающую региональное планирование, программирование и прогноз.